

五百四峯堂詩鈔

五百四峯堂詩鈔

卷之二十一

順德黎 簡簡民撰

辛亥年

中園玩雨

曉煙春暖花花雨碧籠紗日薄交光亂風恬作態
斜地文酥且氣物量稱年華昨夜西堂睡初聞半
部蛙

雜詩貽致中上士

過年猶有賣文儲
遍選村花繞敝廬
問法衆香阿

閔佛上乘經典種花書

師善種花

兩樹木樨香獨園
六時金粟落諸天
請公花下同齋飯
不犯黃龍半字禪

玉皇觴罷百神回
忘却瑤京滢露杯
老衲閭浮伸右掌
隔河沙斷雪山來

吾求玉蘭師言隔江某氏一木花數百往可得也

緋桃十韻

天姊隔雲層
自傳無盡燈
思兼春嫗姁
愁壓醉膏騰
潤筆求精婢
迴波泥老僧
身輕憐欲墮
色重怕

難勝秦客迷容易劉郎嫁未曾香吹風可食

飄風作食

維摩經語

紅洗露還增居定金爲屋看須日繫繩目成

魂自與名好喚誰磨悅已君當爾沾衣我不能今
來伴居士前此亦摩登

石友

蠟石丁未典于佛山去冬始還我所蓋昔年歲饑稍得石友力作詩謝之

佛山歲荒後石我別汝歸寄汝高明家惟與鬼瞰
之凶年故多鬼人鬼相雜啼不惜煮汝法能克幾
人饑能爲衆香飯知汝義不辭汝亦諒故人坐視
空裳衣海客入豪門瘦骨無容儀至今三年餘思

子誠可思客居親與鄰僂指還在茲當時就食者
不知所濟誰非君此一行不足兩月支是於兩月
閒肌肉君所施痛後日月遠安復語痛時非踐君
久要我亦忘爾爲襦褌花簷日竹木交清暉雲英
暖將化光彩入須睂玩物大溺喪利往小安危我
有兩石友紫雲天半飛紫雲硯以獻吾師關學使飛飛去不返
忍別復傷離升沈固有定上下逐無期支離我與
汝同德更相宜

雨

春夢遠黯黯雨深花去人鴈遲孤自別鶯坐濕容
身柳偃雲沙合波明艸樹新離情禁晚晚衣上凍
生塵

鴈鶯復興

傷春鶯絮雨送遠鴈歸風去住吾無那暄涼日不
同身心相夢覺雲水失虛空煙柳煙還柳將愁一
萬重

寄東河先生

時護暹羅貢使北上

口翻筆受拓方言賦手揚雄吃舌存舊路早年徵

博士新書當日照輪軒先生云此行可載外國方言也哀鳴我負
空羣過學問人忘五馬尊剩與鱸堂作都講惟餘
鵲卵在師門

花枝

花枝春鳥輕搖漾足風情衣凍初陽亂苔陰落蕊
明出牆別日遠寫影盡心橫最喜高花外山痕一
抹晴

寄鄭葵圃

家屏

大使

時爲鹽運批驗在清水濠

官閑今鄭老魚樂古蒙莊濠濮遽廬宿江湖在宥

忘羹嘗吳隱水家世伯夷鄉

鄭古孤竹人

豈復因人熱

臣門一味涼

寄李生潛夫

橘柚花明雨後月一夜南風積南雪夜來送爾傷
春心徘徊屐齒花泥深知君舟夢波滿枕別我雨
香雲繡襟梧桐沈碧上邨日三月人閒似傷別饑
蜂濕翅露蕊肥老蝶褪粉春雲熱清川悠悠風景
闌跳魚潑潑波圓圓碧雲青天白日暮美人搖情
方執蘭翩翩白袷少年事滑滑黃鸝老夫睡

薄暮

正晝雲光薄斜陽雨色深
春增天態度苔合樹青陰
積水漫離抱空邨喜足音
吟燈薜蘿晚花影閒沈沈

春晚寫興寄其詹

雲色似春池池春憶謝詩
動花風淖約去地雨迷離
白髮行將及青陽出不辭
濠梁莊惠意合是有魚知

又寄四絕句

細雨春波夜窈冥知君時夢衆香亭夢經烟水青
蘿嶂日日青蘿似夢青

芭蕉葉破竹竿橫風雨辭春不忍晴病身將夢虛
舟似更作春波拍拍聲

詩人生子不虛譽四歲真能讀父書待我添丁作
昆弟經生家訓合菑畬

東西樵五百虛屏北苑驅山遣五丁便合南華新

注脚道書閑對道山青

其詹前手寫予南華辨韻
序以歸今書來索此書並

畫索

卽景絕句三首

海日蒼茫入雨天
人家洶湧上炊煙
斜欹一道白
玉羣嶺斷百株紅木棉

橫江汎汎浪淘沙
南少東多風雨斜
刻意送春春
不去溪流三日入邨花

土狗蠕蠕動綠莎
青蜓欸欸點清波
眼前觀化何
曾化拂岸水痕漂
蜺蛾青蜓點水下生蜺蜺老爲
蛾泊土際是爲土狗土狗

形如促織老
復爲青蜓

暮春睡起漫成示門人何深

鳥聲花片襲低風珠溷簷端雪颺空夢覺坐忘仍
蛺蝶雲浮淵審愧虬鴻功名俯仰成陳跡吟望低
垂得病翁已判湖山與宗炳悔將詞賦老揚雄

蘆灣漁笛題其詹小影圖

夜色夢夢月勞勞蘆花飛高笛聲高笛聲濤肆秋
戍削蘆葉颼颼如奏刀蘆花漾月色淡薄明水風
皺琉璃瓢嘯泉先生不畏冷愛此夜氣嚴不囂踏
足已知國土淨竄跡不異空虛逃秋商排雲復拂
水水鏡將逆去聲翻江濤江濤欲作未遽作忽見波

浪生柳梢海天新寒一萬里襲爾七斤大布袍先
生骨重束柴立稗子肉粟已豎毛回頭仰面若有
問此有何好之調刁汝問何好忘我答使人之意

今也消憶昔十年我生日長夏正熱西山椒

順德城中

山君吹一曲爲我壽曲已花木轉寂寥拉我升高

踞大石引吭裂竹悲青霄嚴城萬家叫歸夢滄海

一鶴橫踏潮自時別日浩蕩濶人事轉多路轉遙

邇來室竅欲養氣齒落鬚白髮影蕭自云好樂如
好道已進乎技吾聲銷無名無義虛則出始覺雅

俗同一條割然奇鬼嘯老木廓如生鵲呼迴颼鬱
熱坐使河漢沍荒寒亦令土石焦冬天語翠夏語
赤人坐自附根塵膠至音至聽則不遠劍首一映
真咸韶衆香亭深多鳥巢花光冥冥日初朝小絃
璫琤大絃嘈珠璣滑撒瑟瑟跳春來一百二十日
百二十曲皆新調知音者稀古嘆息政復以此來
相邀

夜合

夜合胎始破其聲微可聽坐幽聞悄悄香遠去冥

冥却月瑤花白沾衣露葉青
颼風堪作食隱機衆
香亭

孟夏

孟夏邨已深炊煙閒層綠中園花葉影凍若雲覆
屋疎疎雨如竹琅琅竹如玉風化蝶有雙奏媚鳥
必獨紛然理無竟靜者意自足

四月廿一日感咏

骨冷夢魂遠地荒雲木深花應老夫淚竹見故人
心苦雨遙同日慈烏不去林墓銘焚揚本無愧到

幽陰

伐惡樹

碩果須十年惡樹才一歲年來深巷尾浩集風雨
勢其下有古屋若敖恐爲祟此復資鬼庭多狀
魑魅沾液甚蜚灼嗅腥中狂醉課隸手刀斧仰面
足先退儲藥防有毒佩符使無忌鴟嚇口落實蠹
沸癭焚贅經營剗疏附格削髡蔽翳芟蕒斤運風
折洩日寫地溪水綠以澀墻桑暖還翠重惜此餘
壤欲以植芳桂客子昔寄家回首得蕪穢滋蔓自

愧忤去惡自濡滯天晚雲蕭蕭庶得暢吾氣手刃
治亂絲斯志焉可遂

雨夜懷其詹

颯颯雨響瓦茫茫江漂雲樓頭風獨立天氣夜中
分日月行蒼鬢泥塗結露筋山鍾落月迴應共夢
邊聞

落花

日日蒼藤老樹根紛紛流水古桃源看多榮落忘
憐惜誰向風晴私怨恩時有佳禽愁自語生來香

樹坐無言深春淺夏關門裏溫伯逾時道已存

雷

四月廿六日作

去年今日雷早熟亦有成今年是日雷沸騰聞市
聲雲日薦高花花上行冥冥村雨萬葉響雨灼驕
陽蘋漠漠平野煙白氣黏深青上旬屢夜雨稍報
蟲剪莖南方早禾夜雨則生蟲得此暘一灑天機合農經何
云穀不實盜利於雷霆斯人亦民蠹其害甚蝨螟
山魃何伎倆不答物自寧

大雨

江邨萬樹杪浩浩捲黃河炎海立凝雪雲巒吹作
波翕張勞萬有方寸約無多穩睡花迷艇微風響
綠簑

復雨作寒

四月廿六日雷廿八日雨而寒農人云雷尙可寒不可

昨雷甚雨見晴虹今日炎霄忽晚風寒轉初冬入
初夏臥聽江水聒江楓田花浪浪霜漫白

禾作花方言曰

浪白山荔青青雲不紅要識

唐堯治平世神無靈蹟忘天功

澄江

渟水無去流一抹一萬頃崖翻孤樹根天寫衆峯
穎翔雲空無憑驚禽叫其影寒鋪泮冰薄清逾厚
地永於中豈不有此外是何境惟須目憐心那許
罔問景兩大將迎虛一氣今古靜至道不物物上
兕無等等我猶泥空色時與綴深迴白袷如月鷺
青油幔煙艇

新竹二首

昨夜風雷昨夜春曉來春去日華新亭亭新竹矜
風格瘦約烟綃似故人

一束蕭蕭玉五竿未勝離立未勝看花梢今夕初
弦月也惜方墀落影寒

種榕

嶺海多大榕大者逾十畝下疑雲雷屯上有日月
古菩提得根柯社櫟資液乳不祥與其壽有畏莫
予侮鬼庭黑張幔叢祠冷燃炬神鴉暮杳杳望雲
叫風雨風雨夜窈冥以膏此鄉土往往原上屋中
夕咤田父浩然山海靈集以烟霧語曉來邈無跡
但見青膺膺南俗好奇怪曰是神洞府沈沈鼎煙

靄𠵿𠵿隱鐘鼓今年於廟瓦西指斫一股村人目

瞠瞠怖畏舌爲吐明晨猿猴杙倒插我溪澣榕以倒插

大易長十日雨霖霖小甲初破黍十年水深黑大庇

若縣寓春村二三月流花澹容與垂陰賦樛木拾

翠有游女清夏宜老夫肺病枕風渚調調聽竽籟

潑潑得魴鱖無由附魑魅足以障炎暑忽憶壅腫

友香山老主簿嗜石昔米黻愛竹今鄭篴主簿之

衙齋榕根作門戶香山縣主簿馬君有臨號月泉貧而好古齋頭羅致古物摩抄

忘飢嘗索子一詩未有以應於此偶及之遂以寄馬君也○世傳鄭谷口好竹凡玩好多以竹爲之

必銘以八分
復自刻之

將曉

蘭風香獵獵竹月靜荒荒戶外燈光歛墀東人影
長星芒依樹碧海氣隔雲黃骨瘦兼吟苦槎枒畏
板床

苦李依甘荔和其詹

感君苦李作具有風人風果有不食吉節豈居貞
凶不以苦累人幸以苦自容生是天使獨見棄命
當窮園丁或惜我移入甘荔叢不能分我甘坐見

荔自紅豈不鑒我苦天定人無功陽春二三月薇
帳芍藥房雄蜂雌蜺本自不成雙寄書報苦李
無好亦有同同心接臭味我是食蓼蟲

莊子同則無好也

遊仙詞四首

衆仙朝罷玉宸君袖拂歸風馬踏雲回憶鈞天正
如夢霓裳才破酒醺醺

艷說大羅仙滿天頭銜誰號大羅仙木公才下通
明殿要問羅浮葛稚川

若人蘿帶本仙才險路幽篁獨後來與作頑仙作

才鬼三層高閣是

鶴引鳧申龍虎泥老君掉頭吾弗知莊生只受無
爲法願公天河曳尾龜

巨雨時東河先生住城北憂之有述

懸河聽雷尋常事僂指銷魂十七年

乙未六月

渦地下

驚山出口灌城圓似井窺天也知舊雨非今雨已
破初禪入二禪浩浩衢波眠得否騎曹騎馬欲乘
船

九眼井

嶺南多仙井仙液皆不凡旣以滋地脉亦得避海
鹹茲井在城北覆石誰始鑿錯落九石眼厥數配
極南或大可提瓮或小才容甌年深積砂泥堅若
口碣銜模糊堙其六局似神所監沈闇試一窺陰
飈寒不堪眼明到底碧耳響衝氣酣神物內盤屈
凍睡恒眈眈中夕山月午萬家夜氣嚴鰥虬獨廻
首忽見遺珠三搏攫復擺脫失爪嘆愈貪洪濤殷
地肺窟壓受痛箱直疑黑磐下攪入滄海帆仰謂
寥天高三月投一潭朝來挽綆人指顧怪立談石

色外慘淡四匝垂胡髯至今爲寒莎瘦勒碧髟髟
又聞古老說靈怪理莫譖三髡占穴汲得泉異清
甘吾希陸鴻漸辨水結茶庵

瓜棚

雨殘邨瓦夕陽中飯訖藤棚借晚風動輒歸心遲
暮雀不多秋氣已寒蟲故居老筍新居地十歲丫
髥一歲功竹上斑斑昔人淚於瓜何事也殷紅

曉氣

曉氣淒淒似晚秋今年六月五更頭虛乘大水還

家夢凍立青山當我樓枕近蟬聲苔及榻海吹魚
沫雨添流交州薏苡明珠價遮莫拘拘濕病僂僂
又上去
二聲

晝氣

晝氣暄涼驟不同煙蒸塵沸互西東輪囷雲勢酣
風黑散漫陽光閒雨紅懸霤波濤浮枕簟破蕉琴
筑付梧桐不愁寂寞客牕下盡態陰晴天井中

夕入小園有懷

露氣侵燈碧愈光獨尋幽樹夜來香迷離竹影循

墻走瑟縮禽聲接葉藏人意又驚芳草暮秋心先
入白花涼藥煙閣外桐陰石魂不歸來夢亦荒

送東河先生北轉正定府三首

石門靈溜小桑田一頃雲沙費幾年吳隱北歸深

憶舊南來猶及酌廉泉

石門水
涸久矣

官行十月到官衙我亦初冬還我家南北嶺頭天
萬里共將幽夢赴梅花

金臺秋夢浩蒼涼盡日雲沙似夕陽伯樂早須登
要路過都容有病乘黃

夜渡江

樓臺燈隔水晶屏萬道寒鉉有角星
烟語深深舟淺淺江流浩浩夜冥冥
旗風城上秋涼動電火雲頭雨黑停
已失詩人柳絲館謝二故不煩桃葉問
津亭

曉鐘

五更潮大月漫流海寺晨鐘瀕洞浮
獨鶴孤雲杳如夢烟潭風渚浩然秋
江湖伏枕元多警今古橫胸敢說愁
最憶鐵橋觀日了下方銅盞出龍湫

廿年

時羅浮看日出甚
久乃隱隱聞下方鐘

汪靜父席上作兼呈邱先生馬中翰

翁是白鳬吾白鷗偶來園沼話滄州樓臺風雨晴
將晚楊柳人烟遠欲秋陶令停雲平陸水班公朝
日上天騶初筵傷別先辭席許對新知說舊遊公邱
迫行期以饑者多先去去後馬
君始來馬君端州一別今七年

咏蜻蛉

冰雕蟬翼學蟬瘡天與狂飛謝苦吟殘暑艸暄風
雨後碧池荷老夕陽深生憎喜子羅爲幕黠引嬌

雛花繞襟獨有道人常釣在釣絲無釣汝無心

蝴蝶

不飈低波不拂雲警風怯水却依人香浮一覺遊
仙夢瘦絕三分示病身別有羅浮蠶繭甕出乘烟
霧翅車輪始勝六氣編游韞送我華胥醉幾旬

蝶翅如
車輪云

村中送客

君愛橫江邨渡頭落花依槩送君舟娟娟新婦潭
心月狼籍邨眉數寸秋

熱甚呈東河老人

今年多雨閣暑氣熱甚始欲歸江鄉青蘋波皺風
渚碧白鳥翅挾煙水凉公行嶺上馬嘶月山入江
南楓已霜莫辭幾日張紅繖着紫蕉衫衝赤陽

五羊晤馬中翰還端州後却寄

別夢西懸峽山月秋帆初轉峽山風城頭夜角黃

江白竹裏吟燈青雪紅

書院後亭在萬竹中署曰青雪

占象人誰

作都講必傳君倘信揚雄

馬君曾手鈔子詩一卷欲付梓

著書心

力今鉛鈍愧爾磨刀遣石工

時贈余硯

韻字韻一首

客堂暮稍涼木葉清潤花暉如橫波石拙得高
韻雲平天象澄秋色詩境進獨夜心多警促織潛
已近

因東河老人寄江右同年鄧蓀州

時

東河北轍風憐目異地同心笠語車嶺月光分兩
都講春風遙賀一籬廬舊知獨行門羅雀今恐先
生釜有魚倘問樵夫故豪侈萬花園屋百城書

今年南熱殊常中夕有作東李東田

士楨

竹梧不肯攪臆鳴快意風聲當雨聲愛爾綠天明

水地

自云讀書蕉園

讀書青眼碧燈檠今年七月秋如此

半夜高雲氣未平安得肌膚獨冰雪一句三賦火

山行

旬日之開三警回祿

七月十三日將曉聽風雨既卽散時祈雨

五更南雨過江鳴一吸西江渴瓦聲揭海盲風翻
曙枕捎雲病葉湧秋城諸陽已閉陰須戰何物相
摩火遽生我似瘠蟬病風露苦吟垂翅揭枯莖

十四日喜雨

雲色溶溶欲作霖
雷風蘊藉氣沈沈
石能爲火融爲水
天肅至陽行至陰
鶴背空清遠山碧
蘆灣波沸晚河深
紅羊故鬼黑灰下
莫怨寒泉沾楮襟

復小熱呈東河老人

六月七月交風日
競炎毒一雨千里涼
稍熱意亦足天光
渟海碧雲影行野
綠明河夜浩蕩晞
露曉瑟縮灑然葛
衫風新秋到肌肉
秋心警離思去鳥
帶遠目已似洞庭
晚波寒葉辭木昨
夜夢煙蘿西風吹
語竹歸意又汗漫
大水浮獨宿獨宿
雨淫淫

獨去月漉漉

十八日望雨

水柔苗軟已吹波日緊風枯又損河雲漢夕秋陰
一片海山朝爽碧無多綠章遂動清冷氣十四日雨稿
木虛聽大小和安得無田有家祭衆香厨煮五仙
禾

十九日雨滂沱之餘油油若酥有秋之喜
同於農夫

昨夜看雲黑作團已屯風色釀空寒中宵海嘯丹

如鷺正旦簷平雨似磐大火炎炎淨鶉次九淵肅
肅動鯢桓東南十郡三千里閭闔涼颼一氣歡

夜雨懸河寫懷錄別呈東河老人

離思滿虛堂秋旣望十九誰挽天河水萬瓦海波
走簷溜凝燈色爍爍火龍吼衆流直不斷簇作銀
竹藪翻令夜深黑光怪搶戶牖海天約真寒獨坐
安可受萬響不成喧一靜吾自有人居三城底雲
塞九霄厚又疑移大壑倒置傷南斗東南海山地
一碧蕩氛垢吾知堦下石朝來或成白吾師道體

胖火宅無雪藕昌黎汗漫膚滑叔柳生肘庶幾快
一睡栩栩漆園叟夢中恐傷別別意亦已久蓬扶
十年直散散一日剖中夕秋淒淒感此念朋友何
如此遙夜論文共杯酒簡也三月來以五月七日
謁見先生泣
然話不庭頃木偶倏然方病蘇瞠乎已塵後昨讀
夷吾傳生我者父母知我者鮑子無告坐疾首功
名過四十明義痛自負凌朝江水碧秋色灑高柳
悲心接浩蕩佳氣拂壟畝仙舟白雲帆可待雨晴
不

贈孫上舍平叔

爾準

二首

九面湘風八桂林
四方桓鳥七哀音
虞泉西景黃茅裏
越國南枝白露深
宋玉愁多秋送遠
賈生年少古傷心
釣徒豈爲親喪隱
早有煙波漁父吟

八座年家八拜恭
雖無車騎有雍容
舍亭司馬深稱疾
逆旅梁鴻也賃春
老我呼牛又呼馬
驚人如虎一如龍
莫傷鵲草萋碧共
采菖蒲花紫茸

俗粵

云七月廿四日
安期生生日

雨日廿四

昨暮朱霞高半天魚經心法九江傳早秋漣葉雨
清絕處暑涼風人黯然蘇肺潛知月勝火憂農深
笑士無田聚糧三月安慈母少病孤兒減藥錢江
人以晚霞高低占雨遲速甚驗雨
以勞魚花也又農人云處暑不可雨

七月廿九日追送東河老人於花地老人

囑時地景物不可無詩別後次爲絕句

十首

大江秋色白浮涼去鳥來帆定水光無際雲沙天

一轉風旗影動夕陽黃

鷺潭振柁
向大通濤

岸花颭颭揭青簾獵獵江風吹白尋紅樹碧山官
獨笑畫船詩客入秋簾

雲昏風黑望鷺潭大艚如山浪似帆花裏衫亭花
上雨斜兼雲日到秋衫

五湖煙波雙鯉魚兩漢金石一函書花雨竹煙昏

別眼別時今日此精廬

公以兩漢金石記相
貽覃溪先生所寄

公言君但宿春糧我是長齋周太常宦情亦似離
筵薄歟得南來一味涼

南河昨日發官程北海今朝薦禰衡開罷重封還

北望花梢一角廣州城

是日作書
薦友生

挹芳園榭此長亭山色潭光好晝局獨遲仲文看

江雨雨餘閑煞數峯青

園爲官吏借以飲餞之所
是日獨扁公拉錢雪航同

北待一
日未來

裊裊西風拍拍波江楓初赭帶殘荷繽紛不似桃

花水爲少汪倫此踏歌

昨與汪竹東約
以事不得來

臨水登山古別愁不關風雨滿襟秋舊例遠行盡

一哭青衫還濕老江州

打鼓鳴鉦夜窈冥中流鷺鷥總揚舠涼風不許遙

相望官燭江雲一點青

八月八日宿伍氏園林

霖川讀書處

三首

花影樓陰記昔遊玉釵聲滑下簾鉤風廊柿葉池

荷雨十六年中此夜秋

子昔作城西雜詩有句行到小樓花影下隔簾聞落

玉釵聲一時稱之今十六年矣詩已刪

詩人有病却無閑傷別傷秋臥掩關夢寄西風暮

送遠白鷺潭外碧雲開

東河老人北行霖川及門也以病不能出餞

煙幃冰枕暖雲浮夢醉春山不覺秋祇覺客心孤

迴絕晚唐紅袖倚高樓

予是日得洪谷子春山一幀中有美人長累黍而韻

絕世後
歸平叔

夜過孫平叔

月午大城秋潮光一郡浮此人如此夜應在庾公
樓地暖忘遲暮天空有別愁江南他夕夢梅月北
枝頭

八月十五日大觀察吳公招飲同林汪孫
三君明日咏懷投贈

狂簡釣徒侶魯公今有之日思鹿脯帖風送鱖魚
詞夙昔貧爲士泓曄氣入詩浩然來溟滓幽絕刮

馮夷南食窮搜徧西歸卅載茲詹詹小言賦局局
大方嗤服野雲烟重官尊禮數卑花磚梧日轉松
障壁風吹水凝綠天院菊深黃葉籬坐涼彈石瀨
秋緊咽琴絲林九起彈琴起視霜空色蕭蕭志士悲旋親
元化句脉脉遠春移暖響卿雲溢光華聖日爲
遺音得平淡鬱思或欻欻律中邕喈鳳才欽大小
兒家聲清以迴樂事憺忘疲法曲漢陽渡歌童楊
柳枝是日歌先生自製漢陽渡口三年向東道此事憶南皮玉
饌庭花晚金飈桂粟垂城頭團玉鏡酒面漾金漪

生幾新知樂誰能百罰辭中筵神張王促節鼓淋

漓

作鏡鼓

意浹隨飛動杯闌入別離嶺雲眠布被關

月照霜髭話我邱夫子傷心老畫師詎拋愁阿那
亦問夜何其文字沈酣久空明藻荇滋簷停黑竹
栢人墮碧琉璃有母嘗羹切沾公愛客私燭偏花
繁跋衣軟露驚肌蝴蝶他宵夢兼葭一水湄衆香
邨鬢黷孤艇臥欹危柔翰時還作良臣誠可思府
中今日語身後子雲疑長揖開鈴閣嚴關啓玉笈
九衢潑明水初鴈呌涼颼兔窟深深急銅龍的的

遲回頭想官樹鴉影落寒墀

題吳大觀察濯足圖小影

眼中青碧入五嶽夢裡山川間雙脚脚跟蓊蔚雲
浮浮洗雲合化萬里流潭光崢嶸無暇影山影祇
壓竹帽頂泠泠禿袖松入風兀坐似石肘似松冰
雪兩髣風雷胸詩骨瘦立力魄雄毛孔八萬青芙
蓉一芙蓉一長者子是時先生洗足已十地徧滿
八德水

和平叔秋宵見懷

三才集卷三
遙識秋城上秋光月一分江明出山雪柳暗入沙
雲室靜愁空濶天清獨見聞鴉飛帶棉葉墀影動
紛紛

偶出郭秋色已深感東河公之行日遠平
叔之別日近矣於餘閑室寫懷贈平叔
海碧天青淡日光雪陰山翠灑秋涼風浮病葉隨
人影吟泥生衣滿夕陽代謝知交真共命短長魂
夢亦思鄉抗風詩社城東在聯句城南有此堂
平叔製我衣

已自藐姑勝雪霜亦非須賈贈衣裳後先生日憐
同命江嶺孤兒共有喪金紫他年更哀痛菱荷送
老獨芬芳兩須深篋徵遊記東海波塵不可揚

與予先後
一日生

贈別沈見亭廣文奎還長洲

我宗昌谷頗能仙君學東坡不墮禪珠樹池隍雙
翠鳥梅花江嶺一青氍門卑霖雨從桑戶樓古風
雲待仲宣他夕松陵看明月虹光知有米家船

九日許孝廉周生

慶宗

置酒觀音山同韓

東老汪竹東林哲侯孫平叔李東田作

歌

張筵勢高萬象出深杯行雲匝蕭瑟十年茲山雨
重九秋色蒼蒼此風日樹梢仄景平案光人閒卓
午塵頭黃當胸颯爽風雲氣入眼窈冥滄海涼海
涼何自自扶桑萬里上洵君衣裳君衣易警心易
傷七人五人非故鄉林生感調爲春陽木葉無言
抽暖芒江南楓樹夢中綠江水春心愁未央寧知
客裏百里糧嗣宗出門老更狂兩回重九吾畏說

今日此山君勿忘背人灑淚遺千古落照悲風起
大荒忽然萬井烟海白星河瀾漫燈火碧浮屠離
立懸空虛餘霞大橫劃西北良時旦暮吁可惜此
身哀樂生有極肩輿仰面月露寒樓閣沈沈浮夜
色萬井炊烟渺漫如海人家燈火時出烟中寺塔雙懸餘霞千里

十一日韓大夫東老

是升

林上舍哲侯

浚

復置酒以予足軟移譙三元宮與汪孫
許李諸公作

昨日高遠多悲心花露酒痕并淚襟江山眼老今

古濶溟渤氣大風雲深今日開筵接平野平蕪山
陰澹瀟灑瑤笙石磬靜白晝落葉飛禽亂秋瓦黑
橫雙塔壓長影瘦削兩峯勝一把昨暮清冷上界
鐘復此因依舊遊者七人三日兩追陪七人明年
能復來天青白雲一鴈哀稻梁滿地鵲作媒饑鵲
鬼眼秋更碧叫風嘯火焚大槐諸公鴻冥何纂哉
抒憂作達戀餘杯別後眼前同有懷他時東西南
北夢共此日月金銀臺夕陽滿面風滿袖琳宮宴
罷羣仙迴秋崖冷花明不開

休細談行貽許周生孫平叔

勸君近休深細談談深情如風飽帆帆風相待轉
相惱此語別時君始諳三日藩府深潭潭高堂多
風秋滿衫我自懷人託江柳天青葉黃情不堪我
交平叔始兩月相識明日霜纏簪西風半夜吾已
老我老得友吾無慚嘲元久矣逢桓譚見傳不見
心亦甘千秋語言付一哭卅載心血殷重函豈無
良朋叔也耽得味之外遺酸鹹况君妙年戎與咸
九州浩浩馳雙騶剩憐嵇康懶且老柴立已如晞

髮聃何如二子日過我合我二與一爲三我餘閑
室在城南病設一榻燈一龕大穿溟泮細毛髮巧
歷不得況其凡畱叔且住君亦住慎勿出城秋氣
酣大江日夜不肯息風雲蕭森鬱鷺潭別愁江上
山差參

歸夢行贈平叔

菊花滿籬白雲高樵夫昨夢歸邨臯柴門夜開秋
水白天地一物無所逃曉來語君君語我西風客
帳懸波濤歸心大江五千里耿與水月相勞勞楓

林見天猿墮影風露濶遠資夜號不及三聲客已
醒哀音隱耳淚在袍夢中哀樂各已杳獨計別日
增鬱陶逝將放懷拂袖起君向梅關我花里嶺梅
開花我夢君君眠花店逢故人

夜雨平叔佛山送福節相

夜雨金聲鏘瘦竹鴈叫新風寒粟粟濕螢避寒攢
近人照爾舟夢江南春斷腸柳惺吟白蘋暮愁茫
茫胡蝶雲津頭鳴鉦慘將曙淺水涼煙此何處近
知減帶與鄉愁腰腹仍大難僂僂

九日之宴惜侯秀才貞友

雲松

不與席作

詩貽之

城上花臺塔上峯
七人九日五吳儂
登樓八詠須
家令善哭諸賢有
嗣宗山勒地形臨
碧海天開潮
勢蕩霜鐘
明年能會惟應笑癡絕
先要陸士龍

寒鴉

寒鴉畏影避不得
天地并作秋水色
浩浩煙霜千里高
亭亭三點兩點黑
汝自哀鳴夜長極
俯視巖城深閨寂
我自竦肩鶴一隻
苦吟喌喌雜歎息
勸

君雙眼清迴碧耐此孤月凌厲白莫宿高樓最高
柳主人已爲路旁客花房春風吹舞衫舊燕新人
不相識窮簷凍雀爾所見一瞬空倉不得食何如
入我香苑樹盜飯慈烏共朝夕嗚呼汝鴉無肝膈
昨夜淒涼今不憶西風刺骨一萬丈南枝微命幾
寸翼

秋曉左石厓相過奏琴予未起紀夢

至人何人作巧弄天風石泉洞天洞美人孔蓋金
葳蕤穿花成雲結飛鞚蒼玉自鳴裘不波水凝雜

佩春颺凍珮聲隱壁夢在眼我琴君曲莊周夢

此作

操

茫然心醉披我衣秋花煙深胡蝶飛西風四壁
若懸水泠泠虛白吹珠璣乃知君術過左慈感我
勞魂成我私懷仙歸風秋正悲心手在君君不知
罷彈不語庭葉落兀兀僵松柱冰壑歲華今夕徂
鬢脚爲我鈞天續廣樂

月

秋月入重城分光到我庭片雲人共影多露物增
明海氣難爲夢堂虛易有聲曉鍾淒緊絕天地欲

崢嶸

露

重露玉溥溥煙深竹亞欄聽蟲知艸淺無月有花
寒衣袂吟邊濕江天夢裏看琴絃感風氣緩縵不
成彈

風

涼風起西極吹立八溟山洶湧秋心苦雲濤不得
閑吹臺鷹睨日紫塞馬臨關是地真蕭瑟淒然到
夢閒

竹

我心風葉勞我竹日堅高
開戶雲停月驚禽露滴
袍故人魂一片今夜水三篙
自照亭亭影歸看新鳳毛

松

高絕晚蟬風四松溪曲東
藤蘿媚秋月窓戶畫江
漢往日維舟飲深天染酒
空近知村穫早鴉背日
先紅

艸

曉色秋雲涼古原初日黃傷心已千里何忍更殘
陽病馬嘶空濶寒鴉影渺茫無勞感鴝鵒歸去護
蘭場

入邨寄平叔並呈許周生

浩蕩草木風併日作秋色九月迫上冬十赭照一
碧孤舟點江天歸雲翼蒲席大城塵氣中黯與烟
水夕青山對白日去住兩寂寂三山撒雲波一堠
隱石壁新寒感緩帶何必萬里客入邨歛空濶始
免物態逼村香晚逾厲花晦多澹白紛紅避遲暮

亦覺鬢蕭索開門竹竿瘦簇葉涼城城高梢青天
遠遠意接歸翮虛堂燈光細無侶來所憶知爾心
不閑會此夜長極江頭作歸夢風水催別席許君
玉琴聲金奏亂淒激昨日君送我壯淚已欲滴計
日君別我我眼老痛刺酸風一千里結面冰縷直
還家此三夜離趣熟嘗識他宵大江水與爾自歎
息歎息嶺頭月嶺隔月不隔月下病懷人吟苦抽
肝鬲惟恐雨雲黑江城深幕幕江湖滿大地遂使
汝影隻還當卽出邨及汝未行役

自題覓句圖小影持贈平叔

山澤養其外形容合枯槁幽貞媚其內詩句或娟
姣自顧命微細芳性托弱艸生來足秋思寒瘦異
郊島連抃含清風慄慄感少昊何必秋始悲秋悲
益微渺贈子自卽目前後如夢杳薄袖天青寒獨
立山白曉波濤涌黃落離憂鬱浩浩山川邈深遠
鬢髮潛禿少他時對相憶未覺今日老何況少壯
時而能爲君道我昔稍似君相者云腰裏歷塊風
塵內愧汝聲價早蹭蹬過四十半百一潦倒菁華

褰裳竭哀樂迴首了年深更衰憊衰憊庸可保身
名兩隕滅何用見皇考至公懸乾坤致遠豈梨棗
得君若昆弟國士實俊造文章歸根源此事非艸
艸化身遣隨君願汝少病惱別後相思顏何以寫
聲去素縞揚越明月墟千古照情好

菊十月朔日作

昔昔歸心到此籬白雲黃菊夢相思才過明日畱
佳話持贈秋風勝好辭竹徑故人虛上番梅梢寒
月落南枝一年花事侵尋別汝得先春不道遲

溪上晚步舍弟蔣平叔書至有作

一幅水光無有邊涼風啼鴈落深天青山屋角煙
江外紅樹橋頭夕照前容易別懷成昨日尖新寒
氣覺今年側身湖海看君遠搔首乾坤老我先

素馨

瘦葉纖藤自相

入聲

當娟娟窺得及肩墻不勝月露

難爲色要感心魂始與香春暖銀篴奪孫壽

欲開時摘

而穿之如篴

秋風夢艸寄劉郎輕軀細骨誰憐得須問

剗風百和床

村口晚觀潮上寄九日粵秀山諸君

西日蒼蒼海水東
海門橐籥响潮風
覆甌出沒遙
岑白沸火崢嶸夕
浪紅倦客悲心多
遠眼高臺雲
木淨霜空秋山山
響樓頭月獨此花
邨照病翁

樓韓

東老
所名

菜畦

天高霧雨涼畦瘦
菜寒芳翅葉鸚鵡
綠粉花蝴蝶
黃竹根繞籬水簾
色讀書堂多暇無
機事湖山落
晚光

桂花

桂叢寒有花勞者暮還家雨澀香逾緊窓深風故
斜新方傳楚醕計日及秋瓜好自收金粟新年駐
鬢華

近得新方以小甌盛花注酒而炊之
復蒸爲酒開筵而就芳醇如舊醕

中夜

潮滿櫓聲圓花溪出夜船岸虛波拍拍襟動月涓
涓安步憐蟲語微吟穩鳥眠幽思擬康樂園樹亦
南田

清曉

人閒好風日爲是有花枝我得生南國春仍入四
時鳥鳴圓撒瓦魚暖旣跳池十月勝禪衲無衣物
自私

別平叔

十月廿五日

離懷感風雲澹澹海水涼握手波影衣人面寒夕
陽自從識君還日日輪轉腸僂指一百日悲歡數
蒼黃夜夜作別夢旦旦同一堂充日以爲歲百年
未覺長幾日出邨來無夢神已荒魂魄若散木波
濤掀客床一日百相阻一語半或忘吁嗟乎平叔

吾老深可傷頽齡破四十齒落視茫茫聰明戰哀
樂一往難自當精枯眼出骨有淚不成行亦知心
血衰悲極舌轉僵路長語言短西景上風檣後會
天地閒病軀無復強以約慰目前有約則有望時
日費山川何日更何方熟知此別濶有別無商量
但以今昔心共茲明月光或於時命外此願得一
償一償豈不喜悲乃倍尋常恐汝須與睂似我今
日蒼各自出小像共詫誰家郎勉君千秋事誠實
有文章才學兩相資其過或相戕吾知君必傳無

使心飛搶浮沉元氣中此物真金剛功名旦暮取
汝歸其勿忙入門語仁兄嶺海此古狂願爲梁溪
水日夕繞君傍

別後呈同餞諸君

客散天寒江雨深潭雲低合去帆陰誰家柳樹勝
迴首今夜梅花無限心試夢風波勞反側離筵山
水泥登臨英韶迎送多奇石不許懷人日擁衾

佛蓮滿月

誕兒才十日出門送遠離是日城南園餞者半喜

悲故人度大庾折梅愁且思忽悟梅有子南望一
舒眉至今已滿月安能辭一歸漸老情漸長幾夜
頻夢之夢之歸近易卽可及此期云無兒女情此
語勿自欺况吾非老陶膝下多男兒諒彼呱呱者
恩愛復何知政以不知故哀憐心益微積憐成彼
識從此語孝慈七日歸入門和氣溢門楣八日母
抱孫憶話吾生時生時何忽忽四十五年茲吾知
老母心不敢嫌孫遲寧知兒在側潛已傷吾衰吾
衰不敢言聊穩先生妻羊子與犬子愛至賤亦宜

生平不飲酒主人今少持微酣復微寒日黃桑樹
枝隔水望孤墳年深鬼安依清風入桐竹亦作歡
聲吹

白茶花

剪雪層層膩葉盤月光無色但增寒朝來小玉開
屏立浴罷昭儀隔帳看解語授經應般若非珠明
夜定琅玕仙家品格無柔骨合詠華山女道冠

華字

去平二聲
皆可用

離居行寄許周生

知君南夢臨北關關外日暄關內寒古梅瘦花似
君骨吳天崢嶸行路難故人歸舟大江濶江風揭
浪如吹雪鄉思爭飛東逝波勞魂迴掛南枝月江
上初寒趨盛寒人閒大別連小別冷紅靜白邨花
晚澀露苦香冬日暖遲暮懷人聊曝背長風望遠
能酸眼東藩索莫君何堪爲寄龍井雲牙尖知我
傷離入長夜有此清甘無黑甜府中芙蓉花覆簷
夕陽醉花人意酣花未覺冷君衣添披衣相思人
已遠幾時驛騎來江南江南歸人嶺南客此時一

歌休細談

休細談行子前貽
許君及平叔詩

後離居行從許周生索芙蓉種并寄平叔

我思美人寒涉江
大江水漕無徒杠
美人思我攀木末
髮義霜紅暖寒日
藩府芙蓉天下無
一花韞韞如四不
夕日曛暝琥珀酒
朝雲晻曖琉璃膚
許家公子芙蓉館
花影搖搖鳥聲軟
不知吟望冬景深
但似離居春日短
題書寄我花邨中
花攪別懷中酒同
上言樵子少病惱
下云大江多雪風
書罷城頭浩南望
惟見別時酒邊落
葉山上榕

饒平叔
處園中

山亭榕
甚古

憑君慰我多病翁爲我種花溪曲東綠玉

丫叉削堪把江干便有花船農明年買櫂或過我
深花綠天秋水紅好須作書報平叔佛山東下花
叢叢花密不知舟可通舟行九曲路未終門外三
折皆芙蓉

平叔嘗問予卹居何處予言在
佛山鎮之東渠來惟知佛山耳

寒月懷周生

虛白凝寒潤冰眸中冬圓象厲於秋簷枝映地花
如寫露瓦霏霜水欲流雪在嶺南楊子宅人誰天
末庾公樓

謂平叔

知君高下亭臺夜官樹啼鳥曉不

休

得平叔書寄侯貞友

前權夷猶信路難
歸期蹭蹬爲新歡
離杯別雨征衣濕
水白山枯瀨月乾
楓戍鼓邊青眼夜
霜燈江上黑貂寒
侵尋又餞江南客
應見梅花在驛鞍

五百四峯堂詩鈔

卷二十一終